

que le tout se fasse avec ordre, & dans la magnificence. Ils vont dans les cabanes y exhorter les hommes & les femmes, mais nommément l'élite [107] de la ieunesse: vn chacun tafchant d'y paroître veftu à l'auantage, & de s'y faire valoir, de voir & d'y eftre veu.

En fuite les parens du malade font des feftins tres-magnifiques, où vn grand monde eft inuité; dont les meilleurs morceaux font le partage des plus confiderables, & de ceux qui ont le plus paru durant ces iours de magnificence publique.

Iamais le malade ne manque apres cela de dire qu'il eft guery, quoy que quelquefois il meure vn iour apres cette celebrité. Mais comme d'ordinaire ces maladies ne font rien que feintifes, ou de petits maux paffagers, on se trouue en effet guery, & c'est ce qui donne ce grand credit à ces remedes.

C'est l'occupation de nos Sauuages tout le long de l'Hyuer, & la plupart de leurs chaffes, de leurs pefches, de leur trafic & de leurs richesses s'employent en ces recreations publiques: & ainfi en danfant on guerit les malades.

Or dans ces chofes, quoy qu'il y ait non feulement de l'erreur, mais auffi du defordre, & mefme fouuent du peché, lequel fans doute ne peut eftre permis aux [108] Chreftiens; toutefois le mal eft bien moindre que nous ne le iugions d'abord, & bien moins eftendu qu'il ne nous paroiffoit.